

23. novembari 2009

UKA 2009/121

allannguutissatut siunnersuut

uunga

Uunga siunnersuut: Nunaoil A/S pillugu Inatsisartut inatsisaat nr. xx ulloq xx qaammat 2009-meersoq

Siunnersuutip aappassaaneerneqarnissaanut Naalakkersuisunit saqqummiunneqartoq

Inatsisissatut siunnersuutip taaguutaanut

1. Inatsisissatut siunnersuutip taaguutaa ima oqaasertalerneqassaaq:

”Siunnersuut uunga: Nunaoil A/S pillugu Inatsisartut inatsisaat nr. xx, uu. qqqq 2009-meersoq.”

§ 2-mut

2. § 2, imm. 2 ima oqaasertaqassaaq:

”Imm. 2. Namminersorlutik Oqartussat aktiaateqarluni ingerlatseqatigiiffimmut toqqaannartumik toqqaanngitsumilluunniit tamakkiisumik Namminersorlutik Oqartussanit pigineqartumut inatsisartullu inatsisaanni matumani § 01, imm. 3-4, kiisalu § 3 malillugit siulersuisunut pisortanullu minnerpaamik assinginik piumasqaateqarfiusumut Nunaoil A/S-imi aktiaatit kiisalu aktiaatinik nutaanik pissarsisinnaaneq tamakkiisumik ilaannakortumilluunniit tunniussinavaat.”

Paragraffit nutaat

3. § 2 kingorna paragraffitut nutaatut ilanngunneqassapput:

”§ 01. Ingerlatseqatigiiffiup ataatsimeersuarnerani ukiunut marlunnet atuuttussamik siulersuisunut ilaasortassamik tallimanik qinigaqqissinnaasunik qinersisoqartassaaq, taamaattorli § 02 takuuk.

Imm. 2. Naalagaaffik, naalagaaffiup Namminersorlutik Oqartussanut tapiissutaasa nul koruuninut annikillisinneqarnissaasa tungaanut, siulersuisunut ilaasortassamik ataatsimik toqqaasinnaavoq. Periarfissaq tamanna naalagaaffiup atorpagu

ataatsimeersuarnermi siulersuisunut ilaasortassanik sisamaannarnik qinersisoqassaaq.

Imm. 3. Ikummatissanik ujarlerneq iluaquteqarniarnerlu eqqarsaatigalugit inatsisitigut, aningaasaqarniarnikkut inuussutissarsiornikkullu pissutsit pillugit qaffasissumik uppernarsaatitalimmik ilisimasaqarneq siulersuisut katitigaaneranni takuneqarsinnaassaaq.

Imm. 4. Siulersuisunut ilaasortaq Inatsisartunut imaluunniit Naalakkersuisunut ilaasortaasinnaangilaq.

§ 02. Siulersuisunut ilaasortaq ataatsimeersuarnermi qinerneqartoq tunuarpat piffissap qinigaaffiup sinneranut ilassutaasumik siulersuisunut qinersinissaq siunertaralugu Naalakkersuisut immikkut ittumik ataatsimeersuarnissamut ataatsimiigiaqqusissapput.

Imm. 2. Tamanna aamma atuuppoq Naalakkersuisut ilisimalerpassuk siulersuisunut ilaasortaq ataatsimeersuarnermi qinerneqartoq,

- 1) akiliisinnaajunnaartutut nalunaarutigineqarsimasoq,
- 2) iliuuseqarsimasoq pineqartup siulersuisuni ilaasortaaginnarnissaanik ataqqinassuseerutsitsisumik, imaluunniit
- 3) sivisuumik napparsimanini allatulluunniit sanngiillinini pissutigalugit siulersuisuni ilaasortatut suliasaminik isumaginnissinnaajunnaarsimappat, imaluunniit erseqqissumik piukkunnarunnaarsimappat.

§ 03. Pisortassatut taamaallaat atorfinitsinneqarsinnaapput inuit akileraartarnermut inatsimmik sakkortunerusumik unioqqutitsisimasutut eqqartuunneqarsimanngitsut imaluunniit aningaasanik pinerluuteqarneq nakuusernerluunniit pillugit pinerluttulerinermik inatsimmi aalajangersakkanik unioqqutitsinermut eqqartuunneqarsimanngitsut. Kiisalu inuit minnerpaamik siulersuisunut qaffasissuserititanut nallersuuttumik qaffasissusilimmik suliatigut piginnaaneqarluartutut uppernarsaaserneqarsinnaasut kisimik atorfinitsinneqarsinnaapput, tak. § 01, imm. 3.”

§ 3-mut

4. § 3 ima oqaasertaqassaaq:

”**§ 3.** Ingerlatseqatigiiffiup ukiumoortumik nalunaarusiaa akuerisaasoq Inatsisartut ataatsimiititaliaannut ilisimatitsissutitut Naalakkersuisut nassiutissavaat.

Imm. 2. Ingerlatseqatigiiffiup ukiup siuliani sammisarsimasani pillugit ukiumut ataasiartumik ingerlatseqatigiiffik nassuiaammik suliarinnittassaaq kiisalu ukiumut tulliuttumut siunissamullu ungasinnerusumut sammisassatut pilersaarutit kiisalu tamakkunanga aningaasalersuinissanut pilersaarutit pillugit nassuiaateqartassalluni. Nassuiaat ingerlatseqatigiiffimmik aqutsilluarnissaaq pillugu ingerlatseqatigiiffiup politikkaa pillugu paasissutissanik imaqassaaq. Nassuiaat ukiumoortumik nalunaarusiaq ilanngullugu Naalakkersuisut nassiuttassavaat imm. 1-imi eqqaaneqartoq malillugu.

Imm. 3. Tamakku saniatigut ingerlatseqatigiiffiup Naalakkersuisut aqqutigalugit Inatsisartut ataatsimiititaliatut pilersitaanut ingerlatseqatigiiffimmi iliuuserisimasat ilisimatitsissutigisassavai, inuiaqatigiinni annertuumik pingaaruteqartutut

isumaqarfigineqartut imaluunniit ima sunniuteqassappata ingerlatseqatigiiffiup sammisaani aaqquussinikkut annertuumik allannguuteqartitsinernik kinguneqartussatut isumaqarfigineqarlutik. Ilisimatitsissut ataatsimiititaliamut nassiunneqassaaq paasissutissanik Naalakkersuisut tigusinerata kingorna ullut 14-it qaangiutsinnagit.

Imm. 4. Suliassani imm. 2-mut 3-mullu ilaatinneqartuni Naalakkersuisut aalajangersinnaavaat ilisimatitsineq tamatumaluunniit ilai isertuussassatut isigineqassasut. Paasissutissat imm. 2-mi oqaaseqatigiit aappaanni pineqartut kikkunnut tamanut saqqummiunneqarsinnaapput.”

Nassuiaatit nalinginnaasut

Allannguutissatut siunnersuutikkut pingaarnertut siunertarineqarpoq ingerlatseqatigiiffiup siulersuisuinik pisortaanillu toqqaasarnermut tunngaviusunik killiliussanik arlalinnik inatsisartut inatsisaata annertusineqarnissaa.

Tunngaviusumik killiliussatigut taakkunatigut ingerlatseqatigiiffiup aqutsisuisa ataatsimut pisariaqartunik piginnaasaqarnissaannik ingerlatseqatigiiffiup (taamalu aamma piginnittut: Namminersorlutik Oqartussat) soqutigisai naammassiniarneqarput.

Tamanna aktiaateqarluni ingerlatseqatigiiffimmut suugaluartumulluunniit Namminersorlutik Oqartussanit pigineqartumut tunngavoq, kisiannili immaqa immikkut pingaaruteqarluni ingerlatseqatigiiffinnut il.il. aningaasaqarniarnermik imminut napatittumik ineriartortitsisinnaanermut Namminersorlutik Oqartussat periarfissaat eqqarsaatigalugit aalajangiisuusumik sunniuteqarsinnaasunut.

Tamanna Kalaallit Nunaata Aatsitassarsiornermi Aningaasaateqarfia pillugu inatsisartut inatsisaata Inatsisartunit ilusilersorneqarneranut aalajangiisuulluinnarsimavoq. Taamaalilluni inatsisartut inatsisaannut pineqartumut siunnersuutip suliarineqarnerani Aningaasaqarnermut Ataatsimiititaliamit isumaqatigiittumit allannguutissatut siunnersuuteqartoqarpoq Naalakkersuisunit ilalerneqartumik.

Isiginiagassat taamaattut ilai aamma aktiaateqarluni ingerlatseqatigiiffik Namminersorlutik Oqartussanit pigineqartoq Nunaoil A/S eqqarsaatigalugu pingaarutilimmik inissisimapput.

Killiliussat inatsimmi aalajangersarneqartussatut siunnersuutigineqartut ingerlatseqatigiiffimmut malittareqqusani tapertalerneqarsinnaassapput sanioqqunneqarsinnaanatilli. Ingerlatseqatigiiffimmi aqutsisunik toqqaasarnermut qulliunerusumik killiliussat inatsisikkut aalajangersarneqarneratigut, ingerlatseqatigiiffik killiliussanik aalaakkaasunik qularnaariffigineqassaaq, taamatullu aamma aatsitassarsiornermut tunngasuni ingerlatseqatigiiffiup

tutsuiginartutut ilisimasaqartutullu inissisimaneranik erseqqissaanermut siuarsaanermullu peqataassalluni.

Allannguutissatut siunnersuutikkut taamatuttaaq § 3, imm. 1-ip kalaallisuuani kukkuneq iluarsineqarpoq, soorlu aamma siunnersuutip qulequtaa taaguutitut nutaanut aalajangersarneqarsimasunut naapertuuttunngortinneqartoq. Kiisalu Inatsisartunut ilisimatitsissutaasartuni paasissutissat isertuussassat pillugit aalajangersagaq allanngortinneqarpoq, soorlu aamma aalajangersakkamut tamatumunnga nassuiaatini erseqqissarneqartoq, aalajangersagaq paasitinneqarsinnaatitaaneq pillugu inatsit malillugu suliasaq pillugu paasisaqaarsinnaatitaanermut periarfissamik killiliinngitsoq.

Allannguutissatut siunnersuut Namminersorlutik Oqartussanut allaffissornikkut aningaasaqarnikkulluunniit kinguneqassanngilaq.

Aalajangersakkanut ataasiakkaanut nassuiaatit

Nr. 1-imut

Inatsisissatut siunnersuutip saqqummiunneqarnerata kingorna aalajangerneqarsimavoq inatsisartut inatsisaannut peqqussutaannullu danskisut taaguutit tassaalissasut ”inatsisartutlov” aamma ”inatsisartutforordning.” Allannguutissatut siunnersuutikkut siunnersuutip danskisuuata taaguutaa tamatumunnga naapertuuttunngortinneqarpoq.

Nr. 2-3-mut

Allannguutissatut siunnersuummi nr. 2-3-imi siunertarineqarpoq Aatsitassarsiornermi aningaasaateqarfimmi Nunaoil A/S-imilu siulersuisunut pisortanullu piumasaqaatit annertunerusumik assersuunneqarsinnaanissaat.

§ 2, imm. 2-mut

Aalajangersakkakkut aalajangersarneqarpoq Namminersorlutik Oqartussat aktiaateqarluni ingerlatseqatigiiffimmut toqqaannartumik toqqaannanngitsumilluunniit Namminersorlutik Oqartussanit pigineqartumut Nunaoil A/S-imi aktiaatit (kiisalu aktiaatinik nutaanik pissarsisinnaaneq) tunniussinnaagaat. Tamatumani piumasaqaataavoq ingerlatseqatigiiffik aktianik tunineqartoq minnerpaamik siulersuisunik pisortanillu toqqaasarneq eqqarsaatigalugu piumasaqaatinik Nunaoil A/S-imut atuuttunik piumasaqaateqarfiussasoq, makku eqqarsaatigalugit:

- siulersuisut piginnaasaat
- pisortap piginnaasai, aningaasatigut pisussaaffinnik naamassinnissinnaanera ataqqinassusialu.

§ 01, imm. 1-imut

Aalajangersakkami aalajangersarneqarpoq Nunaoil A/S-ip siulersuisui tallimanik ilaasortaqaassat, ukiut marlukkaarlugit qinerneqartartunik. Aalajangersagaq piffissaq atuuffissaq eqqarsaatigalugu Kalaallit Nunaanni Aatsitassarsiornermi Aningaasaateqarfik pillugu Inatsisartut Inatsisaanni § 11, imm. 2-mut naapertuuppoq.

Naatsorsuutigineqartariaqarpoq Naalakkersuisut siulersuisunut ilaasortat tamarmik imaluunniit ilaat qineqqittassagaat. Taamaalilluni siulersuisut sulineranni allannguuteqanngitsumik ingerlaannarsinnaanissaaq qularnaarneqassasoq.

§ 01, imm. 2-mut

Aalajangersakkakut naalagaaffik siulersuisunut ilaasortanit tallimanit ataatsimik toqqaasinnaatitaavoq. Taamatulli toqqaasinnaatitaaneq taamaallaat atuutissaaq namminersorlutik oqartussat aatsitassarsiornermit isertittagaasa ima annertutigilernissaasa tungaannut namminersorneq pillugu inatsit naapertorlugu naalagaaffik Namminersorlutik Oqartussanut tapiissuteqartarunnaarluni. Aalajangersagaq inatsisissatut missingiummik Naalakkersuisut tusarniaassutigisimasaanniit aallaaveqarpoq.

§ 01, imm. 1-imi atuuffik qinigaqqissinnaanerlu pillugit malittarisassat siulersuisunut ilasortamut naalagaaffiup toqqagaanut atuutinngillat. Siulersuisunut ilaasortaq naalagaaffimmit toqqarneqartoq nammineq siulersuisunit tunuarniuteqanngippat, taamaalillunilu naalagaaffiup nammineq aalajangersinnaavaa siulersuisunut ilaasortaatitani qaqugu taarsissanerlugu.

§ 01, imm. 3-mut

Aalajangersagaq siulersuisut tamarmiusut piginnaasassaannik aalajangersaaviusoq allatut oqaasertalilaarlugu Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaanni § 11, imm. 1, oqaaseqatigiit pingajuannut naapertuuppoq. Pissusissamisoortutulli isigineqarsimanngilaq pigisanik nalilinnik aqutsineq aningaasaliisernerlu pillugit qaffasissumik ilisimasaqarnissamik piumasaqaatip ilanngunneqarnissaa.

Piginnaasaqarnissamik piumasaqaat suliassaqarfik ingerlatseqatigiiffiup ingerlatsivigisaa pillugu siulersuisut annertuumik misilittagaqarnissaannik ilisimasaqarnissaannillu qularnaarinneqataassaaq.

Aalajangersagaq Naalackersuisut “Kalaallit Nunaanni pitsaasumik ingerlatseqatigiiffimmik aqutsinermut kaammattuutit”-nut naapertuuppoq, tassani aalajangersarneqarmat siulersuisunut ilaasortassanik toqqaasoqartassasoq inunnik suliassamut uppersarsarneqarsinnaasunik piginnaasalinnik, taamatullu aamma siulersuisut katitigaanerisigut qularnaarniarneqartariaqartoq siulersuisut ataatsimut isigalugit ima piginnaasaqassasut suliassaminnik pitsaanerpaamik naammassinnissinnaanerminnut pisariaqartunik.

§ 01, imm. 4-mut

Siulersuisunut ilaasortap Inatsisartunut Naalackersuisunulluunniit ilaasortaasinnaanginnerinik aalajangersagaq, inatsisissatut missingiummik Naalackersuisut tusarniaatigisimasaannik aallaaveqarpoq. Aalajangersagaq Kalaallit Nunaata Aatsitassarsiornermi Aningaasaateqarfia pillugu inatsimmi § 12, imm. 2-mut naapertuuppoq.

Naalackersuisut pisussaaffigaat Namminersorlutik Oqartussat piginnittut soqutigisaasa isumaginissaat Inatsisartunut naalackersuinikkut akisussaallutik. Siulersuisuni ilaasortaaneq tungaviusumik soqutigisatigut aporaaffiusinnaavoq Naalackersuisut (aktiaateqarluni ingerlatseqatigiiffik namminersorlutik oqartussanit pigineqartoq Nunaoil eqqarsaatigalugu) nakkutilliisussatut inissisimanerata, taamatullu aamma Inatsisartut (Naalackersuisut eqqarsaatigalugit) nakkutilliisussatut inissisimanerata akornanni.

Naalackersuisut “Kalaallit Nunaanni pitsaasumik ingerlatseqatigiiffimmik aqutsinermut kaammattuutit”-ni kaammattuutigineqarpoq, ingerlatseqatigiiffiit tamakkiisumik ilaannakortumilluunniit namminersorlutik oqartussanit pigineqartut siulersuisuinut atorfilinnik imaluunniit naalackersuineramik sulialinnik, piffissami pineqartumi nuna tamakkerlugu kommunimiluunniit qinikkatut inissisimasunik qinersisoqartassanngitsoq.

Taamaattorli Nunaoil A/S pillugu Inatsisartut inatsisaata aamma Kalaallit Nunaata Aatsitassarsiornermi Aningaasaateqarfia pillugu Inatsisartut akornanni assersuussisinaanissaq siunertaralugu ilaasortaasinnaanginnermik aalajangersakkap atorfilinnut kommunalbestyrelsimulluunniit ilaasortanut atuutsinneqannginnissaa toqqarneqarsimavoq. Aalajangersagassarli aporfiussanngilaq assersuutigalugu “Kalaallit Nunaanni pitsaasumik ingerlatseqatigiiffimmik aqutsinermut kaammattuutit” naapertorlugit ingerlatseqatigiiffimmut malittareqqusani siulersuisunut ilaasortaasinnaanermut piumasqaatinik sakkortusisanik aalajangersaasoqarpat.

§ 02, imm. 1-imut

Aalajangersakkakkut Naalackersuisut pisussaatinneqarput siulersuisunut ilaasortaq tunuassagalarpat ilassutaasumik qinersinissaq siunertaralugu immikkut ittumik ataatsimeersuarraqqusinissamut.

Aalajangersakkamut aktiaateqarluni ingerlatseqatigiiffiit pillugit inatsimmi § 50 tunngavigineqarpoq, tassani aalajangersarneqarluni siulersuisunut ilaasortaq qaqugukkulluunniit siulersuisunit tunuarsinnaasoq.

Aalajangersagaq akornutaassanngilaq Nunaoil A/S-imut malittareqqusani aalajangersarneqassagaluarpas ataatsimeersuarnermi sinniisussanik aalajangersimasunik amerlassusilinnik qinersisoqartassasoq, ilaasortannortartussanik siulersuisunut ilaasortaq atorfimminik isumaginnissinnaajunnaarallarpas.

Ingerlatseqatigiiffimmut malittareqqusani aalajangersarneqarsimappat sinniisussamik qinersisoqartassasoq, siulersuisunut ilassutaasumik qinersisoqassatillugu orniginakkajussaaq Naalakkersuisut sinniisussat arlaat siulersuisunut ilaasortannortippassuk.

§ 02, imm. 2

Aalajangersakkakut Naalakkersuisut pisussaaffilerneqarput siulersuisunut ilaasortap allamik taarserneqarnissaa siunertaralugu immikkut ittumik ataatsimiigiaqqusisarnissamut, Naalakkersuisut ilisimalerpassuk ilaasortaq pineqartoq akiliisinnaajunnaartutut suliarineqartoq imaluunniit iliuuseqarsimasoq pineqartup siulersuisuni ilaasortaaginnarnissaanik ataqqinarunnaarsitsisumik. Tamanna aamma atuuppoq ilaasortaq pineqartoq napparsimanini allatulluunniit sanngiillinini pissutigalugit siulersuisuni ilaasortatut atorfimminik ingerlatsisinnaajunnaarpat, imaluunniit paasineqarpat taamatut sulinissaminut qularnanngitsumik piukkunnanngitsoq.

Aalajangersagaq imarisamigut Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaanni § 13, imm. 2-4mut naapertuuppoq. Aalajangersakkakut siulersuisunut ilaasortat – Kalaallit Nunaata Aatsitassarsiornermi Aningaasaateqarfia pillugu inatsisartut inatsisaannisut - pisussaaffilerneqanngillat tunuartarnissaminut aningaasaqarnikkut pisussaaffimminik naammassinnissinnaanissamut, ataqqinassuseqarnissamut suliaqarsinnaassutsimullu inatsimmi piumasagaatit naammassisinnaajunnaarunikkit. Akerlianik aalajangersakkami Naalakkersuisut pisussaaffilerneqarput – Naalakkersuisut ilisimalerpassuk siulersuisunut ilaasortaq akiliisinnaassuseqarnissamut, ataqqinassuseqarnissamut suliaqarsinnaassutsimullu inatsimmi piumasagaatinik naammassinnissinnaanngitsoq – siulersuisunut ilaasortap pineqartup taarserneqarnissaa siunertaralugu immikkut ittumik ataatsimeersuariaqqusissamut.

Imm. 2, nr. 1 malillugu pineqartoq akiliisinnaajunnaartutut suliarineqalersimappat siulersuisunut ilaasortap taarserneqarnissaa siunertaralugu Naalakkersuisut immikkut ittumik ataatsimeersuariaqqusissappat.

Tamanna aamma imm. 2, nr. 2 malillugu atuuppoq siulersuisunut ilaasortaq iliuuseqarsimappat siulersuisuni ilaasortatut issiaannarnissamut ataqqinassuseerulluni.

Aalajangersakkat taakku assingi aningaasaateqarfiit pillugit inatsimmi § 13, imm. 3-mi aamma aningaasaateqarfiit inuussutissarsiornermik ingerlatallit pillugit inatsimmi § 14, imm. 3-mi nassaassaapput. Naatsorsuutigineqarpoq ataqinassutsimik naliliisarnermi najoqqutassat aningaasaateqarfiit aningaasaateqarfiillu inuussutissarsiornermik ingerlatallit siulersuisuinut atuuttut malinneqassasut.

Imm. 2, nr. 3 malillugu siulersuisunut ilaasortamik taarsiinissaq siunertaralugu Naalackersuisut immikkut ittumik ataatsimeersuariaqqusisassapput pineqartoq napparsimanini allatigulluunniit sanngiillisimanini pissutigalugu atorfimminik ingerlatsisinnaajunnaarpat. Tamanna nalinginnaasumik assersuutigalugu atuutissaq pineqartoq ataatsimiinnissamut takkussinnaangippat imaluunniit silani silagalugu iliuuseqarsinnaangippat, assersuutigalugu iisartagartornini pissutigalugu.

Tamanna aamma atuuppoq paasineqarpat siulersuisunut ilaasortaq taamatut atorneqarnissamut pisariaqartumik suliassamut atatillugu pikkorissuseqannginnini pissutigalugu piukkunnaateqanngitsut paasineqarpat.

Aalajangersagaq taamaallaat siulersuisunut ilaasortanut ataatsimeersuarnermit qinerneqartunut atuuppoq. Siulersuisunut ilaasortat naalagaaffimmit toqqarneqartut qaqugukkulluunniit naalagaaffimmit taarserneqarsinnaapput, periarfissarlu tamanna atussanerlugu naalagaaffiup nammineq aalajangigassaralugu.

§ 03-mut

Aalajangersakkakkut ingerlatseqatigiiffimmi siulersuisut pisortamik/pisortanik atorfinitsitsisarnerat eqqarsaatigalugu piumasaaqatit assigiinngitsut aalajangersarneqarput. Inuit akileraartarnermik inatsisinik annertuumik unioqqutitsisimasutut eqqartuunneqarsimanngitsut imaluunniit pinerluttulerinermik inatsimmi aningaasatigut pinerluuteqarsimaneq persuttaasimanerluunniit pillugit aalajangersakkanik unioqqutitsisimasutut eqqartuunneqarsimanngitsut kisimik atorfinitsinneqarsinnaassapput. Taamatuttaaq taamaallaat inuit suliassamut tunngatillugu qaffasissumik, minnerpaamillu siulersuisunut ilaasortat piginnaasaattut qaffasitsigisumik, uppersarneqarsinnaasumik piginnaasallit kisimik atorfinitsinneqarsinnaassapput.

Aalajangersakkakkut inuit minnerpaamik siulersuisut piginnaasaattut qaffasissulinnik suliamut atatillugu attuumassutilinnik piginnaasallit, taamatullu aamma ingerlatseqatigiiffiup ingerlatsinera eqqarsaatigalugu patajaassutsimik tunniusimanermillu ersersitsisinaanermut tunngaviusumik ataqinassuseqarnermik piumasaaqatiniq naammassinnissimasut kisimik pisortatut atorfinitsinneqarsinnaanissaat qularnaarneqassaaq.

§ 3-mut

Imm. 1-imut

Allannguutissatut siunnersuutikkut § 3, imm. 1-ip kalaallisuuani kukkuneq iluarsineqarpoq.

Imm. 2-mut

Imm. 2-imi aalajangersagaq inatsisissatut siunnersuummut siullermeerinninnermi saqqummiunneqartumut naleqqiullugu allannguuteqanngilaq.

Imm. 3-mut

Allannguutissatut siunnersuutikkut ingerlatseqatigiiffimmi iliuitsit inuiaqatigiinnut annertuumik pingaarutilittut imaluunniit ima pissusillit ingerlatseqatigiiffiup ingerlatsinerata aqqissuussaananerani annertuumik allanngortitsisussatut isigineqartut pillugit Naalakkersuisut Inatsisartut ataatsimiititaliaannut ilisimatitsissuteqartussaataitanerat piffissalernerqarpoq.

Taamatuttaa Naalakkersuisut paasissutissanik tigusaqarneranniit kingusinnerpaamik ullut 14-it qaangiutsinnagit Naalakkersuisut ataatsimiititaliaq ilisimatittassavaat.

Imm. 4-mut

Aalajangersakkap malitsigisaanik Naalakkersuisut (sukumiinerusumik aalajangersakkanik killilerlugu – tamanna pillugu § 3, imm. 2-mut nassuiaatit takukkit) ingerlatseqatigiiffik pillugu ukiumoortumik ingerlaavartumillu nalunaarutaasartut eqqarsaatigalugit Inatsisartut ataatsimiititaliaat nipangiussisussaataissinnaavaat. Nipangiussisussaataaneq ilisimatitsissummut tamarmiusumut taassumaluunniit ilaannaanut tunngatinneqarsinnaavoq.

Naalakkersuisut Inatsisartunut Inatsisartullu ataatsimiititaliaannut saaffiginnittarnerat pisortat ingerlatsineranni suliat pilugit paasitinneqarsinnaatitaaneq pillugu inatsisartut inatsisaanni paasitinneqarsinnaatitaaneq pillugu malittarisassanut ilaatinneqarput. Taamaalilluni paasissutissat pineqartut inatsisartut inatsisaanni immikkut pineqarnissamik aalajangersakkanut ilaatinneqanngippata Naalakkersuisut pisussaapput suliamik paasisaqarnissamik noqqaassutit naammassineqarnissaannut.

Naatsorsuutigineqartariaqarpoq paasissutissat kikkut tamat paasitinneqarsinnaanerannut ilaatinneqartut eqqarsaatigalugit Inatsisartut ataatsimiititaliaat pineqartoq Naalakkersuisunit nipangiussisimatitsisussaatinneqartassanngitsoq.